

Liabe Zenz,

wos i mir gestern beim Tanz´n ned sog´n hob draud, des muaß i dir jetzad schreim.

I bin 26 Joahr oid, und hob mi gestern sakrisch gfreid, daß du mir gar nir nicht keinen Korb nicht gegeben hast. Wia i die gholt hob um hoibe Zehne.

I hob die einfach nur a so ghoid, ne einfach a so wia du moanst, sondern weil du mir gfoin host.

Und weil i ja unbedingt ja no mit dir Tanz´n hob woin.

Dann hamma tanzt, i woaß no „ Aber Dich gibt´s nur einmal für mich „ hamm´s gspielt.

A so a schön´s langsam´s Liad´l, do hod ma so sche miteinander Schmatz´n kena.

Und Zenz, woaßt das no, wir ham über d`Kapelln gschmatzt, das Sie guad spuid hod, und das i scho öfter die Kapell´n ghörd hob.

Und du host ja gsogd, und sonst nix. Weil du so wenig gsogd host, hob i mi a nimma recht draud, und wia ham hoid a so weida Tanzt.

Doch i muaß da no sovui sog´n, drum schreib i dir hoid liaba.

I hob da ja scho gschrim, das i 26 Joahr oid bin, und i hob koa Wie.

Warum ned, des woas i ned, und mei Muada hod gsogd, sie woaß a ned.

Denn mei Wie, hed´s ja ned schlecht bei mir, des sog i dir.

Mir ham vier Kiah dahoam, und de hoäß´n : Alma, Berta, Cecilia, und Nr. 4.

Alma is schwanger, und de Berta gibt ned so vui Milli wia de Cecilia.

De Kiah, zeid´ld mei Muada no mit de Händ.

Oba wenn i a Wie hob, dann kaf i Ihr a Melkmaschin.

Denn dann geht´s schneller, und Sie wird ned so dreckig mei Wie.

De Kiah miassn se hoid dro gwöhna, se wernd am Anfang a bissal ausschlag´n, oba des gibt´se scho mit da Zeit.

Mir ham an 25 Bulldog, den kamma für ois brauchha. A im Woid, weil er a ned so groß is, und man kann a damit a auf´m schmahla Woidweg fohr´n.

Mei Wie muaß ned Bulldog fohrn kenna, doch des geht ganz leicht, und wird´s Ihr lerna.

Mei Wie kann´se a wos schön´s zum o´leng kaufa. An Mant´l und a Kleid´l, und vo mir aus no wos wenn´s Ihr gfoid.

Weil i im Winta ja in d´Arbeit geh, und a Geld verdiena muaß.

Sie brauchd dahoam aber ned ois a loa mocha, wenn i in da Arbeit bin.

Mei Muada und mei Vadda sind erst 58 Joahr oid, sie sind moan i gleich oid.

In da Fruah bin i no zum Futter do, und auf d´Nacht scho wieda.

Mei Wie muaß mia nur wos guad´s kocha, und meine Sachan immer sauber wosch´n, oba do hilft Ihr mei Muada hod Sie scho gsogd.

Und oamoi mecht i no a kloans Kind, und am End noa oans oder zwoa no dazua hob´n.

Wenn´s sed mei Wei danoch richtn kannt, mecht i zerst an Buam.

Oamoi in da Woch´n geh i zum Schafkop´f zum Alten Wirt, doch um hoibe zwölfe bin i scho wieda dahoam.

Bloß wenn oana vo de Schofköpf Geburtstag hod, dann könnt´s länga dauern.

Oba dafür geh i mit Ihr auf´n Feuerwehball. I zoig mei Uniform o, und Du a lang´s Kleid´l.

Und dann Tanz ma alle zwoa, bis uns da Dreck hint obarinnt.

Und dann geh i mit in die Bar hoch, und dann Schmus ma a wengal im finstern mir zwoa.

I derf garned dro denga, du ned a.

Ja liabe Zenz, so sche wird´s mei Wie a moi hob´n, so sche hod´s ned leicht oane.

I woaß das Du mi mogst, sonst hest ned mit mir Tanzt.

Oba du muaßt mir ned glei schreim, wannst Heirad´n wuist, oba bis in August derfs dann scho sei.

Denn mei Vadda geht im September auf a Kuah, wegen seim Rheumathismus, und dann brauch ma ebban zum Erdepfeglaub´n.

ENDE !!